

Қашықтан тапсырған емтихан...



Елде пандемия басталғалы халықтың өмір сүру дағдысына біршама өзгерістер енді. Ақырындап бәрі онлайн форматқа ауыса бастады. Бұл көшке алғашқылардың бірі болып білім беру саласы қадам басқаны белгілі. Қашықтан білім алған студенттер үшін емтихан және дипломдық жұмыстарды қорғаудың жаңа тәсілі қолданылуда.

Азамат ЖАППАР
azamat.zhappar@mail.ru



Шымшаһардағы қара шаңырақ М.Әуезов атындағы ОҚМУ студенттері оқу жылының көктемгі емтихан сессиясын тапсыруды бастады. Университеттің оқу және оқу-әдістемелік жөніндегі проректоры, техника ғылымдарының кандидаты, доцент Роза Абишеваның айтуынша, пандемия кезіндегі емтиханға күндізгі бөлімде оқитын 13614 студент және 300 магистр қатысады. Ал қорытынды аттестаттауға 5267 студент жіберілген. Онлайн сессия ҚР Білім және ғылым министрлігі ұсынған барлық платформаларды пайдалана отырып, қашықтан оқыту технологиялары тәртібінде ұйымдастырылуда.

Мемлекет басшысының қаулысымен елде төтенше жағдай жариялағаннан бастап барлық оқу процесі онлайн форматқа ауысты. Сабақтар кестеге сәйкес, видео лекциялар, персоналдық жеке т.б. жұмыстар рет-ретімен еш кедергісіз өтті. Қашықтан білім беру оқу ордамыз үшін таңсық емес. Оқу жүйесінің техникалық және технологиялық мүмкіндіктерінің арқасында білім беру барысында қиындықтар туындаған жоқ. Әлемдік және Қазақстандағы жоғары оқу орындары қолданған платформаларды кәдеге жаратып келеміз. Атап айтсақ, IS ВУЗ, Прометей, Skype автоматталған жүйелері мен ZOOM, Cisco Webex Meetings, Moodle, Google Classroom, Microsoft Teams платформалары, iSpring, Teachbase интернет-ресурстары. Қашықтан оқыту жаһандану кезінде кеңінен қолдануды қажет ететін білім жүйесі. Осы кездегі оқу мүмкіндігінің бірден бір жолы екенін студенттеріміз де түсініп, өз тараптарынан олар да атсалысуда, - дейді Р. Жанысбекқызы.

Университетте қашықтан оқыту жағдайында сыбайлас жемқорлықтың алдын алу және академиялық адалдық талаптарының сақталуы назардан тыс қалмаған. Бұл жауапты міндет жоғары оқу орнының сыбайлас жемқорлыққа қарсы қызметін үйлестіруші құры-

лымдық буыны - «Парасат» басқармасына жүктеліпті. Ал дипломдық жұмыстар мен магистрлік, докторлық диссертациялардың қорғалу барысын «Шымкент-Адалдық алаңы» жобалық кеңсесі мен университеттің Сыбайлас жемқорлыққа қарсы іс-қимыл және құқық бұзушылық профилактикасы жөніндегі Қоғамдық Кеңесі қатаң бақылауда. Осылайша Мемлекеттік аттестаттау комиссиясы жұмысының барысы сырттан, құзырлы органдар тарапынан да қадағаланады, бұл ЖОО-ның ашықтығының дәлелі.

– Онлайн сессия студенттердің құлақтарына түрпідей тиіп, бойларын қорқыныш билеуі мүмкін деген ортақ тұжырымға тоқталдық. Оның алдын алу үшін стресс тест жүйесі арқылы пысықтау жұмыстарын әрі дайындық кезеңін ұйымдастырдық. Вебинарлар барысында студенттер өздерін мазалаған сұрақтарға жауап алды. Оған бір уақытта 1500-2000-ға жуық студент қатысты. Прокторинг жүйесі қолданылуда. Бейнеконференция арқылы өткен емтихан және дипломдық жұмыстарды қорғау толық жазылады. Проктор емтихан қабылдаушы оқытушының мамандығына сәйкес болмайды. Цифрлық волонтерларды қосып, студенттерді бағалау жүйесінің әділдігін қамтамасыз етеміз. Мұны тек амалсыздықтың шарасы, мәжбүрліктен деп қа-

зап қоя салмай, керісінше өзімізді оқытудың келешектегі көрінісіне, яғни қашықтан оқыту жүйесіне әзірлеу деп қарауымыз керек, - дейді жауапты басшы.

Роза Абишева студенттер қауымы үшін пандемия кезінде бірқатар жеңілдіктер қарастырылғанын да мәлімдеді. Оның айтуынша, аталған жеңілдіктер аяғы ауыр немесе босанған, денсаулығы, отбасылық жағдайына байланысты қиындыққа тап болған студенттер өтініш беру арқылы жиынтық бағалауға қол жеткізе алады. Мақтааралдағы су алып кеткен ауылдарда тұратын студенттердің де жағдайы әскеріледі екен.

– Шетелдік студенттерге сессияны зор маусымға дейін ұзартып отырмыз. Педагогикалық іс-тәжірибесін жаңа оқу жылына ауыстырдық. Бұл ғылыми кеңестің шешімімен бекітілген. Жазғы оқу семестрі қашықтан өтеді. Қорытынды аттестаттауға жіберілген студенттер диплом жұмысы мен презентацияларын алдын-ала электронды түрде ұсынады. Ал елдегі жағдай тұрақталғанда, оны қағаз күйінде тиісті мамандардың қолы және мөрмен қайта жинақталады. Әрине, әлемді әуреге салған COVID-19 инфекциясы сейілісін. Бастысы студенттер мен оқытушылар қауымының денсаудығын назарда ұстай отырып, заң аясында білім беру жұмыстарын әрі қарай жалғастыра бермекпіз, - деді университеттің оқу және оқу-әдістемелік жөніндегі проректоры.

Токсан ауыз сөздің тобықтай түйіні. Төтенше жағдайдың басты талабы «үйден шықпа» болса да, ғаламтөр қуалаған көпшілік тау-тас кезіп жүр. Онлайн оқуды осы деп ұққан жұрт қазірдің өзінде онлайн оқудан шошып жүр. Алайда талай ел, талай ЖОО-ны бүгінде онлайн жүйеге өтіп, студенттерін жер-жерден жинап, онлайнның баршаға оңтайлы жүйе екенін іс жүзінде дәлелдеп отыр. «Ғылымсыз елдің күні – түн» демекші, университет студенттерінің білім-ғылымнан сусындануға деген ынталары жоғары екенін байқауға болады.

ЕМТИХАНҒА
КҮНДІЗГІ БӨЛІМД
ОҚИТЫН 13614 СТ
ЖӘНЕ
300 МАГИСТР
ҚАТЫСАДЫ

